



# Die Gsalzene

Erschte Johrgang

Dr Ogi hylt: «Die Kaibe wänn my gliebte Huuffe reduziere  
Bald bin y ganz ellai in Bärn, drum muess ebbs bassiere»  
Är suecht sich e ney Findbild und hett scho sehr bald ains gfunde  
Als Exischtänze-Terminator draht dr Ospel syni Runde

Dr FCB will schynts e-n-AG grinde, wo-n-en finanziert  
Dert wurd schynts vom ryche-n-Ängländer dr Stutz parkiert  
Mit däm Stutz kenn me schynts doobe blybe, sait s Club-Oberhaupt  
Liebe Jäggi: Und schynts wird us Wasser Wyy, wenn me dra glaubt

Dr D'Amato dä isch PR-geil und scharf uff Widerwahl  
drum findet är au unser Bangghaimnis zimmilig banal  
zem Gligg hett är fir unsre Bangg sich nit gross intressiert  
will dr Blick sunscht unsre Strip im Fudi-Schuppe publiziert

Dr Bischof Haas, dä hett als Chef in Rom e ganz e tolle Maa  
bi däm ka jeedi Pfluume, wenn si wott, e-n-aige Bischtum haa  
Liebe Rhinow, villicht isch s fir Lyt wie Dii au noni z spoot  
in ere «Republigg Sältisbärg» wurdch au Du no Bundesroot

Unsri Pseudo-Schykanone gnage no an Nagano  
statt Medaille het im Koffer jeede nur e Kimono  
vo Tokyo bis Sapporo hän alli miesse lache  
wie Käsverkaifer Kundebsiech mit Schy statt Auto mache

Dr Martin Ebner zieht no Schwyz, will er dert Styre spare kaa  
Dr Gaudino blybt in Basel, will en sunscht kai Sau will haa  
Dr Thomas Barth, me sait s, wett au sehr gärn ewägg vo unsrem Ort  
Är zieht no Belgie furt und grindet dert e-n-aigne Kinderhort

Unsri Nati-Kicker stehn dumm uff em Raase-n-ummendand  
Doo muess me-n-ebbs ändre, finde d Bosse bim Verband  
Dr Gress, dä bruucht e-n-Assistänt, wär kenntli sofort koo?  
Mir schleen dr Jesus vor, dä bringi schynts au Lahmi no zem goo

Dr Jean-Pascal dä hett als Bundesroot sy Ruggtritt gä  
gueti Nochfolger gits kaini — do muesch fascht dr Erschtbescht nä  
e groossi Schnure hän si alli — und au Hirni nur wie Bohne  
worum nit wie bim Dolly ain im Parlamänt go kloone

Dr Clinton maint, dä Sex-Skandal hett ihn nid gross tangiert  
Mir frooge-n-uns, worum in Bärn denn gar nyt so bassiert  
Wenn s Ruthli Dreyfuess Strapse draht und ihri Hyfte schwingt,  
kasch sicher sy, ass jeede Maa in s näggschte Kloschter springt